

HELBEST

XEMCIVÎN

-----  
HETAV NE LEYLAN

Çapa dijital

Sîrwan Hecî Berko  
Malpera Amûdê  
2001

[www.amude.de](http://www.amude.de)  
[info@amude.de](mailto:info@amude.de)

Çapkirina vê pirtûkê bêyî destûra  
Xemcivîn û malpera Amûdê qedexe ye



# TEMAŞEVAN

Her pertûk

dikare rengê te

biguhêze dil.

her awa ji nama te re

dibe cil.

û kula ala te

hêz li min hilgaft.

ez ne cadûbazim

bendên razên te ji hev vekim.

li min bihna demê fireh ne hat.

wek teyrokê zadê min da ber xwe,

**Pir min çand,  
çendî min çand,  
ne dîrok Ji cografîkê vebû ,  
ne qûç raserî cihê xwe dibûn .  
tu giş bûyî çar-pênc gepên rewan,  
tu hatî cûtin.  
li ser masan raxistî ma û ma ,  
li ber  
stemê tu bûyî bênder.  
Mixabin!!  
te ji xwe ne pirsî ,  
çima ez bûme temaşevan ?**

**28 -8-1998**

# **FIRINDÊ XEWNAN**

**Dixwazim,**

**di asmanê te de**

**bilind bifirim.**

**Piştî ko tu,**

**ewran di bin baskan de**

**bibînî.**

**Binase,**

**ez nema dikevim**

**ber nêçîra te.**

**4-1-1994**

# HETAVÊ

Li ser tîrêjên te,  
ez banga xwe dişînim.  
bi awirên te,  
ez nimêja xwe bi cî tînim.  
hetav e li ser dilê min,  
li ser canê min.  
kaniyên ko kenê te dîtin,  
gerek ne miçiqin!!  
ew destên ko destê te  
girtin.  
gerek li ser serê şêran  
ne veciniqin!!

evîna me di kulik de ye,  
herdem hêvî di malzaroka  
hêviyê de ye.

Hetavê,

dema em bi hev re bin

bê pîvane,

şev e yan roj e ?

bê pê û gav e...

pêvajoka evîna me,

bi bihna pûngê dest pêkir,

di gulzaran de xwedî bû,

û xwe bi mehra filan girêda.!!



**Hetavê,**  
**li ber deryê gazinan metalan**  
**neke... ? !!**  
**meger ji ezmanê bihriyan**  
**rondik dibarin,**  
**û herdem xunav li ser dêma**  
**gulê dilûse.**  
**bi şev û roj ,**  
**em li bîra hev in**  
**û ramanên me tucar**  
**cotê xwe bernadin.**  
**3-5-97**

# MOTIK

Heger ew tîp bi destê te bişkê,  
tê hezkirina xwe  
li ber bê berde!!  
tê çikçikana nama evînê,  
ji ser dehfê bifirîne.  
tê her û her dest li ber rû,  
mînak pepûkan bimîne!!  
bi hestê ciwan buhar dixemile,  
bi tava jînê, hêlîn dide ser kavil e.  
xema şikîna tîpê bi destê te,  
“erd” û ezman disincire.  
heger ez bêm bala te,

tevna xwe ne ber de,  
û rîsa hilman  
dîsa bi rêşîne.  
bela teşî bi destê te zivir neyê,  
bela kenê te,  
li girêkan nebirîne !!  
bela lib bi lib xewn  
bi dar vebin.  
Bizane,  
heger motik hebe  
stêr bi şevê re  
Qeys bi Leylê re dicivîne .

19-7-1997

# ÇÛNA TE !

1-çûna te ,

li kulîlkên dilê min

dibe terez .

wekû çawa qawanên

dev li ken diçilmisin .

wisa evîna minê bejin çinar,

ji bilind paya xwe tête xwar .

agirê birûska xatir xwestinê,

gavan bi kontakê re ditevizîne.

û jîna min derbasî

şevên spî dike.

roka bendewariyê bi gera

li dora xwe , serê min gêj dike .

2-Çaxê civînê dil bû

şikefta “ Hera “

li bende Cibrîl

ev çend sal divê rewşê de ye.

bistiya razên min ,

ji ber peyv û çavneriyê

xwe dide alî ,

li gelek çal û çeperên

hêviyê xwe diveşart .

ta niha çi bayî

tevna pîrêpîrê ne biriye ,

ne jî hêlîna kevokê

**ji peravên awira min rabûye .!!**

**şûrê mixabin û poşmaniyê**

**di kalan de bêzare ,**

**tereza malik wêran**

**her û her bi ser kulîlkên**

**dilê min de dibare .!!**

**pêre keriyê gazinan**

**hate ser delavê lêvan ,**

**tinaz û bîranînên me**

**li kaş û newalên hilman**

**terqiyan .**

**ne ez li ber aramê lehengim.**

**ne tu karî**

rojiya evîna min bigrî .  
tev li tayên xweyî rojane ,  
em bilind firiyên .  
va buhar kulan ji dor  
kenê perwanan dimale.  
ez û te jî  
mîna Qaz û Qulingan  
wek du tilûrên rêwî  
em bûne cotek  
û  
li hêlîna hingivîn vegeyriyan  
14-11-1997

# SERWERÊ

Diva min bi gota ,

giriye te cem e ...

bi derde

jîn e ... yan dar e ...

xemkêşe bi kesere ...!

diva min bi gota ,

nîsana te

ji salê dere ,

yan ji buharê

bi xeyd û xeme ...!

diva min bi dîta ,

ew stêra ji dilê te diçirisî ,



**û dibû gelawêja sibehan...!**  
**diva min baş awazên**  
**herdu çavan bibihîsta ,**  
**yan li ber nalîna Zîna xwe**  
**bi ketama ...!**  
**diva min jî**  
**çiya bi kola,**  
**û pezkovî bikuşt ,**  
**xunca ji ramûsanana bişkivî**  
**av bida ...!**  
**hela min ne got**  
**û diva min bigota:**  
**bawerke ,**

**bawerî bi te tenê ye ,  
hîv û roj û yazde “kewkeb”  
li ber te xûzbûn  
ketin gumanan...!**

**6-4-1998**

# DÎL

**Her ko**

**ez berê xwe didim çavên te ,**

**vestîvalê tevzînokan**

**li hêza min destpê dike .!!**

**her ko**

**agirê laleşa te geş dikim ,**

**rewanê min dikeve perestîna .!!**

**her ko**

**ez hêtûna evîna te dibirim ,**

**baskên min dişewitin ,**

**û dilê min di çixêza te de**

**dîl dibe. !!**

# TU DIZANÎ

**Tu dizanî**

**çend hêtûn di dilê min de**

**Ji bo te dikeliyan.**

**çend hezar ahîn,**

**Ji hilma min difûriyan.**

**şev pêde, bala min**

**kedî ne dibû, ne dihat zeftê,**

**diçû sînorê hîvê diderand.**

**yan di nav xewnan de**

**li ser tenahiya xwe digiriya.**

**wêneyê te fire .. fire...**

**Pê û gav qadeke bê sînor**

**daye ber çavê min.**

**ne diwariyê,**

**ne pêrgîbûne,**

**ne pergendebûne,**

**çog na livin,**

**awir bi rewanê te vebûne.**

**ziman ji şayikbûna pêjna te**

**nagere.**

**çarik ji ser çavê pirsê çû**

**û volqana har ji dilê min**

**teqiya û teqiya !!**

**6-3-1997**

# DIBÊJIN

Çi dibêjin

mûyek ji porê wê ji xwe re

kiriye gustîlk !!?

çi dibêjin

navê wê xistiyê berbejneke

û bi xwe vekiriye !!?

bera bêjin , bera bêjin.

tembûra dilê min,

Ji van awazan pêve na xwîne !!

çavê min ji bejna te pêve

roniyê na bîne !!

wêneyê dergûşa hezkirina me ,

ji ser riwê kaniyê tîrêjan dide.  
her çavî dike tora rokê,  
her kesî bi xwe re di kenîne,  
û evînê jî dilê kevran divejîne !!  
dibe ko pirsîn çê bibe.  
tu kê yî? ez kê me ?  
em kê ne ?  
bera bêjin çi bêjin !!  
“ ez û te “  
em yek best e û meqam in  
bihna hemû gulan,  
li ser lêvên buharê  
em dixwînin.

7-3-1997

# LI GULISTANÊ

Li gulistanê ,  
li ber siya darê,  
li nêv hevrişma ji dilan derdihat,  
can û keser û nimêj  
li yek torê ketin dîliyê.  
dil ji danê ne rawestiyan,  
kursî ji hembêza masê ne liviyan.  
bi Laleş me sofîtî dît,  
em gihan eşqa Cezîrî  
em gihan bin baskên yezdanan,  
me şev û xewn bi hev re perest.  
ahînên me, bi pêjnan ketin pêxîla hev,



û çavan bi sedê pertûkan  
di bîbîkên hev de xwendin.  
heya peyv û xêz û perparên  
rewrewkê tev li hev bûn.  
rewanên me, wek du burcên  
roniyê bilind bûn,  
pinpinîkan li ber şahî dikirin.  
esmanê gulistanê,  
werê dev li ken bi dîtina  
( Mem û Zînê ) şa dibû .  
pelên daran siya xwe dimijandin,  
û bihna jînê ji hinavê xwe didan .  
kavkulîlkên pistepista me,

riwê evînê diqelaştin.

bi xêr hatin , her tiştî li me dinerî

bi me re dikeniya .

bi her hawî, li her alî ,

xunava hestên me bariya

li gulistanê,

li ser lêvên sosinan

tîpên hêviya me meyan.

bi şahiya me re

nêrgiz , nesrîn û yasemînan

mehra dilên me birîn ,

û tevaya gulan gotin:

ev e mizgîn .

9-7-1997

## PALEVANÊ PEYVA ME ..

Peyv seridîne ,  
ez jî palevanekî jêhatî me,  
dasê bê qeynax navêjim sinbilan.  
peyv seridîne ,  
ez jî palevanê peyvame,  
qalûça xwe navêjim heyvê !!  
erê ez çêliyê çiya me,  
lê deştê serê min hogirî xwe kir.  
min gelek peyv ber das kirine  
hîn jî ezê gelean bavêjim ser komê.  
Li vir û li wir bidim hev,  
heya ez dasîtana azadiyê binivîsînim ,

**wê çaxê zanibin ,  
ezê xwêdana xwe  
bi helalî paqij bikim.**

**4 -1-1996**

# LEYLANÊ

Min tu di dît , aveke zelal .

min digot: kengî ez bighêm te

ezê devê xwe têxim ,

kaniya dilê te ,

ezê tihna xwe bişkînim.

ez gelekî beziyam ,

lingên min

ji kaş û newalan ,

ji kêstek û striyan qelişîne.

li ber bayê har ,

baskên min qerimîn e .

Leylanê ,

di derya te de ,  
ez wek laşekî bê ser û ber  
bi avê re çûm .  
wek hingê ji kewara xwe  
bi xar çûm .  
çendî caran ez giham hingiv  
û min hingiv da ,  
lê ne neyşekir ma  
ez bimijim .  
û ne gulzarên te,  
li nêv gulan bê paseport  
ez hewandim .

5-9-1997

# BÊCIRÎ

Gelek pirs ,  
di xweziyê de  
kêferatê dikin !!  
zimanê min ,  
ne pûçe ,  
lê awirên te  
bê cirin !!

14-4-1994

# PÊÇANDIN

Herdu awir ,  
di pêrgîbûna çirisandina  
stêran de ,  
tirs ,  
û sînor ,  
û mişextbûn,  
di kewara şahiyê de ,  
pêçan ... !!

18-3-1994



# EVÎNA TE

Evîna te ,  
li kela damarên min  
strana xwe dipêje.  
lewra dilê min  
kêlîkekê tenê ,  
ji dîlanê xayiz  
nabe .!!

4 -2-1994

# PIPIL

Pilpila cîhana bêzariya min ,  
xewnên kewê dîl,  
li ser zinarê hêviyê ,  
dixwîne ... !!

31-12-1993

# GAVA TU ÇÛ

Gava tu çû ?

te ev agir vêxist.

pencên rokê ,

ji ser holka dil te rakir.

min bîrek li gora tîbîna xwe kola,

ez daketim û daketim ,

agir di hindirê min de dilîze ,

û av tihna min sar nake!!

gava tu çû ?

nû li gunehan haybûm.

nû min guh da lîska êgir ,

hunerek di dilê min de çêkir.

ji xwîna min ,  
çavên xwe sor dike !!  
ne hişt ez kela hêsrana bimijim !!  
tu çû û hundirê min vêket,  
tu çû û dilê min ji  
qanê ket.  
awir li benda vegera te,  
li hev siwar bûn ,  
bilind bûn ... bilind bûn ...  
li nêzîk asmanan  
naskirin  
rivîna êgir tu hêz nade ser.  
7-3-1997

# SÊKUÇ

**Pênûsa min,**

**li ser sêkuça dil ,**

**du hêsrana dikelîne!!**

**gava**

**navê min dide**

**û**

**navê te distîne!!**

**15-121993**

# RAZÊ EVÎNA TE

Du roj çûn ,  
du meh çûn,  
du sal çûn ,  
temen hin bi hin diçe..  
hişê min hergav ,  
pelê bîranînên te  
wek kayina xezalan  
dicû .. dicû ...  
buhar e ,  
ez  
nerîna kewên dilê

**te dikim**

**adar e ,**

**ez**

**şevîna arê newroza te**

**dikim.**

**û razê evîna te,**

**hergav**

**pênûsê li dilê min**

**disû .. disû ...!!**

**5-4-1998**

# PIRS

Diramînim ,

çima helbest nayê ?

çima dîlana min

bi awazên were nayê ?

şahî bi rijandina xwînê re

der nayê ?

hawar

ji ber wêrekiya fişeka te,

li newalên ker daqûl nayê .!!

dipirsim û pirs gwîzan e

qeşema dilê te ,

bi kujtina kenê min dihile ?



meger kenê min çû,  
û kenê te sêwî ma !?  
meger Qeregêtran  
li çalê çandî ma !?  
meger nalîna Memo  
li zindanê girtî ma !?  
tu olan mandel nekiriye ,  
du cêwî  
di malzarokekê de bijîn.!!  
tu çiyar bê dilî ne kiriye ,  
kulîlk bi du xwînan  
bêtin vejîn.  
ez û te ji yek zikîn e,

**heger dilê merov hebe**

**û bela ev ji min derew be**

**( du zebeş bi destekî têtin rahiştin )**

**û heger**

**( du serî ne mezin bin**

**di beroşekê de tên kelandin )**

**1 -9-1997**

# QERAR Û CEWAB

Ezê dîsa agir

bi çira te ve deynim.

ezê cama bêdengiya te

biderizînim.

ezê karibim gerdena xwe

bikim pencere ,

zimanê xwe

ji te re bikim rê.

dilê ta girtî ,

Ji perwanên peyvên te re

bikim gulzar .

ezê xwe û te bikim takî

Li hev badayî,  
bi dûv derziya zimanê  
hozanvanan vekim .  
belê ... belê ...  
ezê karibim ,  
nêza evîndar û bendewaran ,  
bi çîroka me bişkînim.  
ezê çavên te bi peyivînîm .  
dasîtanên evînê ,  
bi wana vejînim .  
belê pir kêf xweşbûm ,  
Pinpinîka dilê min  
buhara çavên te bijart .

ferhenga pîroz vekir ,  
helbest û pexşanên min  
dane ser ziman...  
li ser pêlên deryake awazan ,  
tev de ew bûn qerar ,  
û ji buhara çavên te ,  
hoy evîndarê min ,  
standin bersiv û cewab.

1-11-1997

# KORBÛN

Du nesrînan ,  
li du ciyên cuda ,  
bi dûrbîneke kor  
nexşê buharê xêz kirin !!  
çav ,  
ji meşk û sêpiyê girtin ,  
û leymîş kilan !!

1994

## **HELBESTÊ ..**

**Bi sedê caran  
min gotiye te ,  
heger  
mêvana min  
rûniştîbe !!  
bê zengil  
derbas nebe !!  
2-11-1993**

## XEWNA ME

Li ber pûtê pîroz

stû xwarim.

te jî dîlok bi çipka hêsrê re

ji min re distirand.

ma çi ji wilo pêve ?

ma çi ji perestîne wirde ?

hema ez û te û bihn û ba

û jîn

berdewame ... berdewame.

hema şitlên nêrgizan,

tu di dilê min de diçînî û diçînî

hema çîçekên buharê ,



ji evîna min û xwe re  
tu divejînî ... divejînî.  
hema ji biryar û peymanê  
ronî û kifşe,  
xewna me ji landika şevê  
bi firê ket.  
xwe hilda ... xwe hilda ...  
bi xweşya ramûsanê re  
bi rêket û bi rêket.

14-4-1997

## SER ÇAVAN

Nîrê te , li ser stiwê min e,

ha ... ha ... ser çavan !!

hevsarê min , di destê te deye,

ha ... ha ... ser çavan !!

navê min di binya navê te reye ,

ha ... ha ... ser çavan !!

lingê te , li ser

tiliya nivîsandinê ye,

ay ... ay ... ser çavan !!

4-11-1993

# ANAHÎTA

**Bişkojeke spehî,**

**li ser şaxê**

**bi rewşen û ronî**

**gelo !!?**

**hêza evîna min**

**bi awira wê**

**bête girêdan ...**

**ezê karibim**

**têhna bişirandina wê**

**bi pîvim ?**

**31-1-1995**

# DIZÎ

Çinvina xweziyan,

sawîrê buharekê

di mêjû yê min de

dihûne .

li pişt perdê

pirs bi yezdanan re mijûlin .!

xama min jî

Ji salixdanê derket ,

piştî fermêsk

ji ferhenga jînê dizîn .

31-1-1995

# PEYAMA MIN

Bîranînên te ,

bûne ewr,

xwe li kohê çiyayê min girtine.

bîranînên te,

tavên buharê ne,

di hilma min de derd û kul harkirine.

ramanên min bûne deşt,

lehî û firtonan,

ew dar û gul û fêkî,

wek leymiştê

li ber xwe birine.

**min digot:**

**ez mûmekim**

**di birîna te de vêketî me !!**

**min digot :**

**ez nexşekêşê**

**dîroka te me !!**

**ji bo wê**

**hişk û ter**

**laşê min bûye mûmdan.**

**gava te xwest ,**

**di ser serê te re,**

**ez bum refekî murxan.**

**gava te got:**

ji ser lêv û zimanê te,  
ayet bi ayet  
di jîna tekoşînê de,  
ez bûm pehlewan.  
peyvin şayik,  
hevokin ciwan,  
babetin mezin,  
ez bûm kilît  
bi min girtûgeh vebûn.  
ez bûm rengin zelal,  
bi min armancên te xuyabûn.  
ez bûm dîkê sibehan,  
banga bû şoreş ,

**bû ferman ,  
xêr nake xew !!  
rabin ... rabin ,  
li cîhanê min topa  
azadiya te teqand.  
ez bûm dildar,  
ez bûm memo,  
ez bûm Ehmedê xanî  
miftiyê civîn û civandinê  
bi noşî yan ne noşî,  
her tê bixwî,  
ji dew  
nîvişkê ( nûbuhar ).**



**ji bo biçûk û mezinan**

**ji bo kurdan ...**

**raweste ... biramîne...**

**ji bo yekîtiyê ... hevgirtinê ...**

**dasê navêje**

**zadê sînordaşan.**

**qûça pir nekin ... cihê nebin ..**

**ez bûm genim,**

**peyama min**

**giha yezdan ,**

**ez kurdim ...**

**ez kurdim...!!**

**24-8-1998**

## XWEZIYA MEST

Pênûsa min ,  
li doza nerîna te  
lêvên xwe dileqîne.  
dizane germa hezkirinê  
ji sînga te difûre ...  
xayzbûna bîbîkên çavên te ,  
hêrzan dide dilê min .  
ez nikarim salxê , xweziya mest  
ji te re wergerînim ,  
tenê karim bêjim  
keriyên ramanên şerpezekirî  
li ber wana ez bûme şivan .

**?**

**pirsek bê kilît**

**li ber deriyê şermê**

**matmayî ma .**

**hêviyek bê çare dît ,**

**şev pêde li heyvê dinerî ,**

**sibehîn !!**

**xatir ji çavên te xwest ,**

**kodek tembûrê**

**û çend mijgûlên bi hêsir**

**bersiva xwe**

**ji wana stand .!!**

**18-8-1995**

## ARAM Û SAMAN

Li ber peravên derya te...

dimeşim , sergeştim .

bê kelek û gemî me ,

ne jî avjeniyê dizanim !!

çend ayet min xwendin ,

tu kes bi hawara min ve nehat .

min berê xwe da rokê ,

di cihê xwe de zîzbûye

û rawestiyaye !!

tîrojên wê

bi ser holka dilê min de dikevin,

û bi siya min re dikenin .  
dizanim derya te kêre ,  
dizanim avjenê lê ne hêsane ...  
beramber jî diramînim ,  
aram û samana  
bi evîna te re bikêşim ,  
heger li ser dirêjiya  
temen be jî  
ne girane!!  
ne girane!!  
1-9-1992

# DAWÎ NE HAT

Di wê demê de ..

di vê deme de ..

di tariyê de , di ronyê de ..

dixwestin te veşêrin ,

ziman û çavên te girêdin ,

dilê te biguvêşin .

çend xêz û rêz danîn

gotin ... peyivîn ,

û dawî ne hat .!!

di gel hev ,

li ser te çûn û hatin,

**durî vebistin ,  
xwîna te mêtin ,  
qeymax firotin ,  
êrîş kirin ,  
te perçe-perçe kirin .  
te mijtin , te biriştin  
ji xêr û bêra te şûştin ,  
û dawî ne hat .!!  
di binê zindanan de  
birçî û tazî te hiştin ,  
li bin dar û dolab û lêdanan  
neynûk û por hilkirin ,  
çi xwestin kirin ,**

**çi xwestin birin ,  
tenê ramana te...  
tenê ramana te...  
nikarîbûn û nikarin  
ji serê te bibin  
lewra  
dawî ne hat!!  
1992**



# SIBA TE XWEŞ BE

Siba te xweş be  
ji tariyê tu rizgar bûyî.  
bi rengekî nû,  
bi dilekî geş,  
pêre hate bîra min  
baxçeyê gulan,  
buhara dilan ...  
siba te xweş be,  
gula spî  
ji spîda berbangê,  
bi nazî  
te cam û xweşî û evînî

li hev civandin ...  
siba te xweş be  
bi vê hatinê ,  
keskesorek rengê taca kisra  
li serê sîpên te gerand ...  
siba te xweş be  
bi awazên şalûl û bilbilan re,  
bi ahengin zelal,  
li ser lêvên tenik  
bi dengê keman û nayê re,  
vê gavê  
perda guhê min hejand ...  
siba te xweş be

mûm û şemala sersalê ,  
perperîk û perwanê ,  
gotin û helbest û dîwan ,  
ji dil û hiş û hinavê min,  
li ser rûpelan  
te weşand ...  
siba te xweş be  
bi bayê hênik re  
ko porê zer û zêr  
wek pêlên derya  
mû bi mû  
li hev wergerand .  
6-10-1990

# KENGÎ ?

**Kengî**

**baxçevan rehên leman dibire ?**

**kengî**

**tilûr hêlîna xwe xirab dike**

**û difire ?**

**kengî**

**evîna Memo û Zînê**

**bi hezar Beko ewanî dimre ?**

**û kengî**

**darê ala gelê min dişkê**

**û ew lê dinere ?**

**13-4-1995**

# SÎWAN

Gava tu ket ,  
sîwana minî mijmijok ...  
te şerma xwe kiras kir ,  
te pencên xwe lê kirin gulok ...  
hoy dilê şiyar  
ji zû de tu li dor vê ketinê  
diçû û dihat !!  
hoy dilê evîndar  
kula li ser  
wan gotinan hat bijartin,  
çawa hat cûtin ?  
çawa hat xwarin ?

tu ji zû de  
li dor xefkê diliviya,  
û libok bi sed rengî te  
diramûsand .!!  
tê bîra te carekê tenê,  
nikilê te  
bê tirs û saw  
li defa sînga min da .!!  
tê bîra te  
ew kernevalê tevzînokan  
di herdu laşan de,  
vêket geriya û bi rêket ...  
ez dizanim tê bîra te,

tiqtiqa kenên me , ko serxewş  
ji du kewarên hingivîn  
bi firê ket!!  
ma ne bes wilo jî,  
ew tiliyên  
ko bi çî hawî ji hev ne dibûn,  
cotbûna me  
di awazên damaran de jîn dikirin!!  
hîn jî ezê bêjim,  
gava beybûn  
li ser bihna buhara me  
geş dibû .  
gava wênevan

**ji nexşandina cîhana me**

**bêzar dibûn .**

**çîroka me xweşbû û xweşe**

**ji mêj de, ta niha,**

**û heya û heya ...**

**evîna berdewam**

**ji çaxê zayînê ,**

**li her çaxê heyînê,**

**çirûskên bê bend**

**ji pertûkên pîroz**

**ji her nameyên pêximberan**

**der kirin.**

**ma tiştek nema ez bêjim ?**



**aşîman herdem bi me re dikene,**

**û buhar rengê xwe geş dike.**

**fermo**

**bi destê xwe agirê**

**zerdoşt vede,**

**mûmdanê dîsa bigrîn .**

**piştî baskên te**

**li sîwana min serbestbûn**

**em bûn cotek perperîk**

**li cîhaneke ronî**

**firiyan û firiyan**

**30-3-1997**

## REWŞA TE

Şekirê li ser lêvan

ez xistime torê .

hîn mizgînî belav ne bibû ,

bû guvguva hingan li dorê .

ne ko te

nivîsta şevê bi xwe vekiribû

xwena te ya yekane

bibû du parçe ...

herdu dêmên teyî geş ,

bi du ramûsan

berê xwe ji hev guhertibûn .

reş û sorê girêdana serê te ,

**bibû du nîşanên cuda !!**  
**zer û keskên yar**  
**başqe .. başqe .. gora hev vedan !!**  
**ramûsan di gezkirinê de rawestiya .. !!**  
**û herdu diranên bi qul**  
**jehra xwe gihandin dil !!**  
**di derya hêsir xwîn û xwêdanê de ,**  
**tu bûyî gemiya bihn çikyayî !!**  
**kevokên te bi ku de firiyên ,**  
**bê bersiv vegeriyan .**  
**kom û hêzên te pir li paş man**  
**bi vê ezezîtiyê kes ji wan**  
**naçe dam !!**

29-8-1998

